

940.

1448 Mai 4

Nickel Strubel bekennt eine Schuld und verpfändet seine Wiese.

fol. 173v Actum sabato ante exaudi coram magistro consulum et juratis anno etc. XLVIII ist komen Nickel Strubil und hat bekanth, daz er schuldig sey Erasmo Schiltpach 4 ß gr. Davor hat er om eyngesaczt syne und seyns weibis wiszin, vor dem nidirn thor bey Andres Kelners agkir gelegen. Der wiszin Erasmus obgnant gebruchin sal vier jar nest noch eyn andir folginde und vor dy fruchte der wiszen iczlich jar abslahin an der schuld eyn ß gr. Uszgehinde den vier jaren, so sal Erasmus, wenne er der wiszen der vier jaren gebruchit hat, widir lediklichin abtreten und dy an Nickel Strubil, seyn weib und syne erben laszen komen on allen eyntag und ane geverde.

941.

(1448) Juni 8

Titz Passegk bekennt eine Schuld und verpfändet seine Güter.

fol. 174r ^(a)Actum sabbato ante viti coram magistro consulum et juratis quibus supra ist komen Ticz Passegk und hat bekanth, das er Symon Yszemans und seyn weibis czweyn kindern schuldig sey 16 ß und 30 gr 15 heller groschin, dy er ynnen halden und dy kindir mit essen und trinken ^(b)und cleidirn nach notdurfft, ^(b)biz sy czu irin mundigen jaren komen, czihin und halden sal. Dy geschr(iebene) schuld mit seynen erben und gutirn vorphant, ab er on sulche geschr(iebene) schuld nicht bezalte, daz sy ^(c)sich sulchir schuld vor ydirnenlichin doran irholen sullen.

a) alles durchgestrichen b-b) am linken Rand, Einfügestelle gekennzeichnet c) über die Zeile geschrieben, ersetzt durchgestrichen er

942.

(1448) August 4

Heinz Frenzel bekennt eine Schuld und verpfändet sein Haus.

fol. 174r Actum dominica post advincola Petri hat Heincz Frenzil bekanth, daz er schuldig sei Hanszen Frenzil von Mergintal drey schogk funfczehin heller groschin addir so vil cleynir muncze noch werdeschaft. Dy genante summe geldis hat er om gereth czu bezalen uff Bartholomei ubir eyn jar schirsten komende und sulche schuld mit seynen husze in dem Wydacht vorphant. Ab er nicht bezalunge tete, daz er sich sulchir geschribener schuld an synem husze vor ydirnenlichin doran irholen sal.